



Cumün da Valsot

Tel. +41 (0)81 861 00 60 • Fax +41 (0)81 861 00 61 • info@valsot.ch • www.valsot.ch

Poz 86 • CH-7556 Ramosch

Affischa

Suprastanza cumünala dals 29.08.2022

Presidi: Riatsch-Fedi Fadri
Partecipant/s: Cantieni-Lanfranchi Andri
Caviezel-Domenig Ursina
Kirchen-Werro Armon
S-chüsà: Peer-Puorger Victor
Protocol: Oswald Gian Claudio
Fabrica: Paulmichl-Rodigari Albin
Giast/s:

tractandas	tema	responsabel
1	0120 Executiva Acconsentimaint protocol	tuots
2	8715 Ütilisaziun da l'energia Energia Engiadina; contribuziun al man public Reponderar la contribuziun tenor proposta da l'EE-Energia Engiadina	fr
3	0220 Uffizi da fabrica Dum. da fabrica no. 049/2022, sanaziun dad inchaschamaints da funtanass e rimplazzamaint da chombras d'aua, Kurhaus Val Sinestra, parcella no. 1079, Mundaditsch, 7557 Vnà	fr/ap
4	0220 Uffizi da fabrica Dum. da fabrica no. 036/2022, schlargiamaint dal vial agricul existent, Thom-Melcher Matias und Thom-Melcher Giacomina, parcellas no. 11746, God tanter Vias, 7558 Strada	fr/ap
5	0220 Uffizi da fabrica Dum. da fabrica no. 050/2022, schlargiamaint da l'implant da tir da biatlon, Società Biatlon Sclamischo, parcella no. 6038, Sclamischo, 7558 Strada	fr/ap
6	0220 Uffizi da fabrica Dum. da fabrica no. 044/2022, fabricar oura la chasa d'abitar, s-chodamaint cun fouras geotermicas, Mair Linard und Mair Romina, parcella no. 6476, Pedvi 1-21, 7559 Tschlin	fr/ap

7	0220 Uffici da fabrica Dum. da fabrica no. 038/2022, sanaziun da la chasa d'abitar, s-chodamaint cun fouras geotermicas, implant solar, Hoffmann Daniel und Hoffmann Annette, parcella no. 6271, Chaflur 1-136, 7558 Strada	fr/ap
8	7900 Planisaziun dal territori Revisiun totala da la planisaziun cumünala Contrat da dret da cumprita cun Corsin Barblan	fr/ap
9	7101 Provedimaint d'aua Taxas d'attach per fabricats Dumonda dal Spiert Avert a Tschlin per ün relasch parzial	fr/go
10	9630 Stabels da la facultà da finanzas Contrat da dret da fabrica / Not Denoth SA, Martina Convegna cul cuntraparti	fr/go
11	0210 Administraziun cumünala Indrizz da l'EED Acquist d'apparats electronics pella suprastanza cumünala - protecziun da las datas	fr/go
12	8400 Turissem 0210 Administraziun cumünala Turissem Valsot Punt penduossa sur la Val Sinestra	fr/ak
13	0120 Executiva Orientaziuns	tuots
14	0120 Executiva Varia (suprastanza cumünala)	tuots

0120 Executiva

146 Acconsentiment protocol

Il protocol da la sezzüda dals 2 avuost 2022 vegn approvà.

8715 Ütilisaziun da l'energia

147 Energia Engiadina; contribuziun al man public

Reponderar la contribuziun tenor proposta da l'EE-Energia Engiadina

Il vicecapo salüda ils preschaints, impustüt salüda el ad Armon Mayer, il president da l'EE-Energia Engiadina. Armon visitescha la sezzüda per declerar la situaziun a regard la furniziun d'energia, quella fatschenda fa zuond prescha. Our da quel motiv vaiva Armon fingià protramiss actas pel stüdi a man da la suprastanza. L'EE-Energia Engiadina es gnüda orientada davart da las Ouvras Electricas d'Engiadina SA sur da l'otezza dal predschi da forza pel prossem on idraulic (1. october fin 30 da settember). L'otezza dal predschi ha surprais fich, impustüt our dal motiv cha quel predschi es stat sur blers ons ourdvar stabil. Cun quai cha'ls cumüns concessiunaris han tenor contrat da concessiun il dret da retrar la forza pel predschi da produenziun ed üna part dafatta cun cundiziuns amo plü privilegiadas, han ils respunsabels da l'EE-Energia Engiadina fat retscherchas per chattar ils motivs. Las Ouvras Electricas d'Engiadina restrendschan lur produenziun d'energia süllass uras da produenziun, d'ürant las qualas il predschi da forza es il plü ot. Per furnir d'ürant quel temp als cumüns l'energia necessaria, han els da cumprar aint forza sül marchà.

Cuntschaintamaing s'han ils predschs da forza augmantats, uschè cha eir quella forza es gnüda bainquant plü chara. Summaric as po constatar, cha las Ouvras Electricas d'Engiadina prodüan forza be cur cha'l predschi es il plü ot, e maximeschan uschè las entradas. D'ürant il temp chi nu prodüan svesa forz'electric ha han els però percenter da cumprar aint la forza chi vegn dovada illa regiun ed inchargian als consüments ils cuosts causats tras quel agir. A la fin dals quint tils restan las entradas plü otas da la vendita da l'aigina produenziun, ils cuosts cha la cumpensaziun chaschuna vegnan però inchargiats inavant. Pellas Ouvras Electricas d'Engiadina ün affar lucrativ. Il fat, cha la cumprita da l'energia necessaria vegn fatta a cuorta vista, pegiorescha la situaziun implü. Üna planisaziun minuziusa quai chi riguarda la cumprita da forza spordschess la pussibilità da cumprar forza chi's bsögna per predscha plü favuraivels. Affars d'energia sun pel solit, sco blers oters affars eir, cumbinats cun cundiziuns main favuraivlas. Actualmaing fan ils cumüns pertocs e l'EE-Energia Engiadina sclerimaints plü profuonds in chosa. Schi nun es pussibel da chattar accommodaint cullas Ouvras Electricas d'Engiadina, resta la pussibilità d'inoltrar ün plont prol güdisch.

L'EE-Energia Engiadina ha ponderà, cha pussibilitats chi stan a disposiziun per cha'l predschi nouv da 9.1 rps/kwh po gnir tgnü plü bass sco pussibel. Ün adattamaint da taxas fundamentalas davart da l'EE-Energia Engiadina nun es radschunaivla, cun quella masüra as s-chaffis ün dischequiber tanter ils cumüns, quai chi's voul evitar. Lur proposta es da desister süllass contribuziun al man public, a Valsot sun quai 0.5 rps/kwh. Ils sclerimaints cha'l capo da Scuol ha fat pro l'uffizi da cumüns permettian cha la suprastanza decidan quai in quista situaziun urgainta e delicata. Sco masüra da cumpensaziun gniss missa in quint la forza chi po gnir retratta per 1 obain 2 raps pel predschi da 9.1 rps/kwh. Tuot in tuot nu's müdess pellas finanzas cumünals uschè nöglia e pels consüments crodess davent la contribuziun al man public da 0.5 rps.

La suprastanza va d'accord culla proposta e decida da seguir a quella. Consequentamaing han da gnir adattadas posiziuns dal preventiv. L'infuormaziun quai chi riguarda il predschi nouv ed il desist süllass contribuziun pel man public succeda tras l'EE-Energia Engiadina.

0220 Uffici da fabrica

- 148 Dum. da fabrica no. 049/2022, sanaziun dad inchaschamaints da funtanass e rimplazzamaint da chombras d'aua, Kurhaus Val Sinestra, parcella no. 1079, Mundaditsch, 7557 Vnà**

Il manader tecnic spiega cha davart da duonna Adrienne Kruit da la ditta Kurhaus Val Sinestra AG, es gnüda inoltrada la dumonda per sanar ils inchaschamaints da las funtanass d'aua per lur provedimaint d'aua privat. Part da quellass lavurs es il rimplazzamaint da duos stüvas d'aua chi's rechattan sün territori dal cumün da Valsot. La lingia da colliaziun vegn müdada be per part. La petenta vegn accompagnada per quist intent da la ditta aquagrischa.ch chi ha experienza in quistass chossas. Cun quai chi's tratta pro quist intent d'üna sanaziun nun ha la petenta da pajar ingüna indemnissaziun pellas funtanass.

La suprastanza va d'accord culla dumonda e decida d'inviar la dumonda da BAB a Cuoir.

0220 Uffici da fabrica

- 149 Dum. da fabrica no. 036/2022, schlargiamaint dal vial agricul existent, Thom-Melcher Matias und Thom-Melcher Giacomina, parcellas no. 11746, God tanter Vias, 7558 Strada**

Il manader tecnic orientescha, cha'ls petents han inoltrà üna dumonda quai chi riguarda adattamaints necessariass vi dad ün vial d'üna parcella ch'els han surgni da la meglioraziun. L'access cha la meglioraziun maina fin pro la parcella, nun es però sufficiaint per sfrüar quella, uschè chi bsögna da schlargiar üna part dal traget chi'd es massa stretta, e quai per 70 cm. Otramaing nun es pussibel da transir cun maschinass agriculas d'hozindi. Pella realisaziun da quistass lavurs ha la ditta Arina environment SA da Zernez elavurà üna valütaziun da la situaziun. Tenor quella valütaziun esa pussibel da realisar il schlargiamaint da maniera chi vegn tut resguard in möd adequat süls contuorns e sülla vegetaziun.

La suprastanza va d'accord culla dumonda decida d'inviar la dumonda da BAB a Cuoir.

0220 Uffici da fabrica

- 150 Dum. da fabrica no. 050/2022, schlargiamaint da l'implant da tir da biatlon, Società Biatlon Sclamischo, parcella no. 6038, Sclamischo, 7558 Strada**

Il manader tecnic orientescha cha la Società Biatlon Sclamischo ha inoltrà üna dumonda per adattamaints vi da l'implant da biatlon a Sclamischo. Per pudair manar tras concurrenzass eir sün ün livel plü ot bsögna tscherts adattamaints. Actualmaing sun installadas sün üna distanza da 50 meters 5 schai bgias pel caliber pitschen. Qua esa previs d'augmantar quellass installaziunss per ulteriurass 5 schai bgias. Il möd da construcziun as drizza davo la part existent, uschè cha l'aspet nu's müda. Pro las installaziunss pel schluppet ad ajer vegnan eir installadas 5 ulteriurass schai bgias sün 10 meters. Quellass però da maniera chi pon gnir allontanadas in cas chi vegn trat sün quellass da caliber pitschen. A listess mumaint vegn dumandà per realisar üna vetta d'asfalt per cha las curridurass ed ils curridurs rivan d'ürant la stà eir cun skis cun roudass süllass piazzass per trar.

La suprastanza va d'accord culla dumonda e decida il proceder da BAB a Cuoir.

0220 Uffici da fabrica

151 Dum. da fabrica no. 044/2022, fabricar oura la chasa d'abitar, s-chodamaint cun fouras geotermicas, Mair Linard und Mair Romina, parcella no. 6476, Pedvi 1-21, 7559 Tschlin

Il manader tecnic spiega chi saja inoltrada üna dumonda da fabrica per lavurs da sanaziun da l'edifizi existent. Ils petents prevezzan da sanar la chasa da fuond sü. La basa pella elavuraziun dals plans fuorma üna visita oculara tanter il manader tecnic ed ils petents. A chaschun da quella visita ha il manader tecnic pudü constatar cha la sostanza interna da la chasa nun es degna da gnir mantgnüda. Quella chasa vaiva ars avant bod 40 ons, e d'eira in seguit gnüda refatta sainza resguardar da materials e möds da fabricar oriunds. Our da quel motiv as po desister sün ün accumpognamaint da la cussagliaziun da fabrica. L'edifizi vegn dimena renovà, cun excepziun dal schler, cumplettamaing. Per cha quai es pussibel, vegnan allontanadas dal plan terrain fin sü suot il tet tuot las construcziuns existentas. Davopro sun previsas las seguintas lavurs:

- fatschada nord-vest: resta sainza müdadas
- fatschada süd-vest: allontanamaint dal suost pella laina d'arder, rimplazzamaint da 3 fanestras e da la porta d'entrada, allontanamaint da l'antenna dal tet
- fatschada süd-ost: rimplazzamaint da set fanestras ed ün üsch da balcon
- fatschada nord-ost: rimplazzamaint da 5 fanestras
- plan schler: installaziuns tecnicas (schlers e vouts vegnan mantgnüts)
- plan terrain: allontanamaint da mürs, entrada cun paravent, gardaroba, chadafö, stüva, tualetta e spensa,
- prüm plan: trais stanzas da durmir, tualetta cun bogn e duscha
- palantschin: ingrondimaint da la surfatscha d'abitar sainza construcziuns concretas

Il plafond dal schler vegn isolà da suot sü, ils ulteriurs plans sco eir il tet vegnan isolats dadaintvart, uschè resta l'aspet extern da la chasa mantgnü. Eir las fanestras vegna rimplazzadas cun da quellas cun duos alas ed üna traptida. Sco s-chodamaint es gnüda schelta üna pompa da chalur, per quella bsögna trais fouras da 130m. Quellas sun planisadas sün agen terrain, il correspondent permiss davart da l'uffizi pella natüra e l'ambiant es avantman. Quai chi riguarda l'oblig d'ün'installaziun da cellas solaras ha il manader tecnic fat sclerimaints. Tenor ün'infuormaziun dal correspondent uffizi chantunal nu pretenda la situaziun üna simla installaziun. Argumentà vegn quai cul fat cha la chasa nu vegn rumida oura cumplettamaing, il plafond dal schler resta existent. Ils parkegis bsögnaivels pella surfatscha sun avantman, duos han piazza illa garascha suot chasa, ed i füss amo plazzas per ulteriurs autos. L'augmaint da la surfatscha d'abitar sül plan da tet nu surpassa la limita da 30%. Il permiss da la pulizia da fö es avantman.

La suprastanza decida da conceder il permiss necessari.

0220 Uffici da fabrica

152 Dum. da fabrica no. 038/2022, sanaziun da la chasa d'abitar, s-chodamaint cun fouras geotermicas, implant solar, Hoffmann Daniel und Hoffmann Annette, parcella no. 6271, Chaflur 1-136, 7558 Strada

Il manader tecnic spiega l'intent dals petents. Quels han, davo chi han gnü lö divers sclerimaints preliminar, inoltrà üna dumonda da fabrica concreta. L'intern da la chasa as rechattaiva in ün stadi fich nosch, uschè cha la direcziun vaiva fingià concess, davo üna visita oculara dal manader tecnic, ün permiss per allontanar diversas construcziuns internas e per realisar ün access provisoric i'l plan dal schler da la vart süd. A chaschun d'ün'ulteriura visita oculara vaiva la direcziun in seguit fixà che parts da l'extern da la chasa chi han da gnir mantgnüdas, per cha l'aspet ed il character da l'edifizi nu's müdan. La dumonda preschainta cumpiglian in seguit tuot las construcziuns internas sco eir adattamaints externs. Previsas sun las seguintas lavurs:

- fatschada nord: rimplazzamaint da duos fanestras, duos chamins nouv
- fatschada süd-ost: rimplazzamaint da quatter fanestras ed üna porta da lobia, ün nouv chamin, allontanamaint da duos chamins, la s-chala chi maina sülla lobia
- fatschada vest: rimplazzamaint da ses fanestras
- fatschada nord-ost: rimplazzamaint da set fanestras, rimplazzamaint dal tet d'üna tschuffa, allontanamaint dal tet da l'oriunda foura d'aldüm
- fatschada süd: rimplazzamaint dad ot fanestras, üna porta da balcon ed adattamaint da la porta provisorica i'l plan dal schler, ün nouv chamin, installaziun solara sün tet
- plan dal schler: ingrandimaint da la porta chi maina aint il schler, installaziuns tecnicass cun pompa da chalur, s-chala nouva i'l plan terrain
- plan terrain: entrada, stüva e chadafö cun üna spensa, piertan, stanza da durmir cun duscha e bagn ed üna tualetta separada, s-chala nouva il plan sura
- plan sura: gallaria, duos stanza sda giasts, sauna e duscha

Ils permiss supplementars sun avantman. Quai chi riguarda la cumprouva d'energia ha la ditta Kuster & Partner fat üna valütaziun da la situaziun. Quels valan, quai chi riguarda dumondas energeticas, sco perits i'l Chantun Grischun. Els cussaglian da far üna excepziun e conceder il permiss, adonta chi nu sun accumulidas tuot las premissas tenor la ledscha d'energia. Per accumplir quellas as stuvers ruinar la sostanza veglia in möd e da maniera chi vess ün effet negativ pel aspet da la chasa, quai chi's voul però evitar. La sanaziun da l'edifizii cumpiglia fich bleras puncts chi amegliran la situaziun energetica, quai chi vegn valüta fich positiv e pussibiltessa da far ün'excepziun. Pella pompa da chalur sun necessarias duos fouras da 100 meters, quellas vegnan fattas sün agen terrain. Ils parkegis bsögnaivels vegnan eir realisats sün agen terrain.

La suprastanza va d'accord culla dumonda e decida da conceder il permiss in acceptand la situaziun speciala quai chi riguarda las masüras da fabrica energeticas.

7900 Planisaziun dal territori

153 Revisiun totala da la planisaziun cumünala

Contrat da dret da cumprita cun Corsin Barblan

Il vicecapo ed il manader tecnic repassan l'andamaint in chosa quai chi riguarda il contrat da dret da cumprita tanter il cumün e sar Corsin Barblan. La suprastanza vaiva trattà il cuntgnü dal contrat il qual nun es però gnü acceptà dal cuntrapart. Uschè han gnü lö ulteriuras trattativas per chattar accommodamaint in chosa. Il contrat preschaint, repassà eir cun sar Corsin, cumpiglia ils puncts necessaris ed accumulischas las premissas per ch'el po gnir suottamiss a la suprastanza.

La suprastanza va d'accord cul cuntgnü dal contrat ed approvescha quel, uschè cha la direcziun vegn legitimada da suottascriber quel, respectivamaing documentar quel.

7101 Provedimaint d'aua

154 Taxas d'attach per fabricats

Dumonda dal Spiert Avert a Tschlin per ün relasch parzial

Il vicecapo orientescha, cha davart dals respunsabels dal Spiert Avert da Tschlin es gnüda inoltrada üna dumonda quai chi riguarda ün quint pellas taxas d'attach. Davart dal Spiert Avert a Tschlin per ün relasch parzial da taxas.

La suprastanza decida da nun entrar sülla dumonda d'ün relasch parzial. La ledscha nu permetta da far quai, uschè chi nun sun eir amo mai gnüdas relaschadas parts da quints da taxas. Quai chi riguarda però il pajamaint in ratas va la suprastanza d'accord ed accepta cha la segunda mità vegn pajada pür dal 2023.

9630 Stabels da la facultà da finanzas

155 Contrat da dret da fabrica / Not Denoth SA, Martina

Cunvegna cul cuntraparti

Cun data dals 10.08.2022 vaiva la cusgliadra giuridica inoltrà proli manader da l'administraziun üna proposta per ün congrual per conclüder las differenzas tanter ils partits. Our da motivs da mancanza da temp vaiva il manader da l'administraziun protramiss als commembers da la supranza il documaint cul giavüsch da dar resposta schi's va d'accord cul cuntgnü o na. Uschè esa stat pussibel cha la cusgliadra giuridica ha pudü respunder infra il termin in nom ed in segn dal cumün.

La supranza as vaiva declarada d'accord als 10 d'avuost sün via circulara cul cuntgnü dal congrual uschè cha'l manader da l'administraziun vaiva pudü incumbenar la cusgliadra giuridica da cuntnuar cullas trattativas i'l rom da la cunvegna.

0210 Administraziun cumünala

156 Indrizz da l'EED

Acquist d'apparats electronics pella supranza cumünala - protecziun da las datas

Il vicecapo orientescha quai chi riguarda la protecziun da las datas sensibilas dal cumün. Il manader da l'administraziun ha our da quel scopo procurà ün'offerta dad apparats electronics per mincha suprant. Il böt es cha quels apparats servan per tuot las incumbenzas in connex cullas lezchas publicas. Mincha suprant survegn eir üna adressa d'e-mail dal cumün, per cha la circulaziun dals e-mail cun datas sensibilas resta al medem lö. Vairamaing vess la direcziun pudü decider sur da quista expensa, quella ha però chattà per bön da dumandar als pertocs per lur maniamaint.

La supranza salüda da princip l'idea ed inclegia la necessità da quist pass. Da princip fessa però daplü sen d'acquistar notebooks e na ipads. Las pussibilitats sun plü vastas e l'utilisaziun dals urdegns es plü pratica. Il manader da l'administraziun vegn incumbenzà da far ils sclerimaints necessaris quai chi riguarda la differenza da cuosts.

8400 Turissem

0210 Administraziun cumünala

157 Turissem Valsot

Punt penduossa sur la Val Sinestra

Armon Kirchen, suprant dal dicasteri turissem, spiega la situaziun quai chi riguarda ün'eventuala realisaziun d'una punt penduossa sün terrain dal cumün da Valsot obain insembel cul cumün da Scuol. Davart da Scuol es gnü tut posiziun da maniera cha l'idea saja buna, mo cha'l lö nun es propa adattà, cha quel saja massa giò'd via. A chaschun d'una visita oculara han il manader tecnic, il manader da la grupp da lavur ed el tut in ögl il territori da Val Ruinains. In quel lö füssa pussibel da realisar üna punt penduossa tuottafat sün terrain cumünal da Valsot e da schoglier il problem preschaint da la senda existenta chi's rechatta in ün stadi fich nosch. A man da l'uffizi pella svilup dal territori es gnüda inoltrada üna dumonda preliminar cun trais opziuns per ün tragets pussibels pella punt in Val Ruinains. Quella dumonda es gnüda datta a Cuoir sün via circulara per tour posiziun eir als ulteriurs uffizis. Fin hoz nun es però gnüda respusa la dumonda. Ün'influenza sün quella varà la zona da privel, eir scha quella nun es portata aint illa planisaziun cumünala. Quai chi riguarda üna punt chi maina da Sent (Scuol) nan a Vnà (Valsot) propuona il cumün da Scuol d'invier ün proget.

La supranza decida da priorisar la realisaziun d'una punt penduossa in Val Ruinains. Ün proget cumünaivel cul cumün da Scuol vegn tut in consideraziun, scha insomma, pür plü tard.

Proprietaris da seguondas abitaziuns

Armon Kirchen orientescha chi ha gnü lö in venderdi ils 5 d'avuost l'inscunter cullas proprietarias ed ils proprietaris da seguondas abitaziuns. Sper las infuormaziuns davart la cumischion da turissem d'eira eir il capo preschaint. Üna part speciala da l'occurrenza es statta l'infuormaziun dad Angelika Abderhalden. Ella ha infuormà sur da las activitats da la Pro Terra Engiadina. Cha la cumparsa nu d'eira uschè buna sco ils ons passats varà da chefar cul termin. Quel d'eira quist on la prüma jada pür in avuost. Id es da ponderar sco chi's voul proseguir cull'occurrenza.

Uffizi forestal Valsot – magliascorzas

Ursina Caviezel orientescha cha sün territori dal cumün da Valsot saja gnüda svolada oura bundant 1'500 m³ laina chi'd es pertocca dal magliascorzas. Quella laina ha stuvü gnir allontanada immediatamaing ed es gnüda svoulida oura cul elicotter. Tenor il silvicultur para la situaziun pel mumaint suot controlla. Quai chi's rechatta amo sül fuond dal god vegn rumi actualmaing da la ditta Janett Tschlin SA.

Uffizi forestal Valsot – via da Vadrain

Ursina Caviezel orientescha, cha la vetta d'asfalt sül trajet da la via da Vadrain saja gnüda realisada e la via es averta ed in seguit eir transibla pel trafic motorisà.

Società Anna Florin – Occurrenza d'infuormaziun e barat tanter ils cumüns

Il vicecapo orientescha ch'el ha tut part a l'occurrenza insembel cun Andri Cantieni. A quell'occurrenza sun gnüts invidats ils cumüns da l'Engiadina e da las Vals dal süd. Ils rapreschantants da la Società Anna Florin han repassà la problematica quai chi riguarda la mancanza da spazi d'abitar per glieud indigena, respectivamaing glieud chi sta permanentamaing in nossa Regiun. Tanter dals cumüns haja dat ün barat d'infuormaziun. Mincha cumün ha pudü exprimer che chi vegn fat actualmaing per cumbatter la situaziun. Fadri ed Andri han pudü orientar cha a Valsot es gnü strichà l'inventar dad edifizis characteristics pel aspet dal lö, uschè cha quels edifizis stan be plü a disposiziun pella construcziun da spazi d'abitar per prümas abitaziuns. Quel fat es gnü salüdà dals ulteriurs participants. Il cumün da Puntraschigna ponderescha da fundar üna fundaziun cumünala chi sustegna intents da fabrica per spazi d'abitar per indigens. Üna part dals mezs pudess derivar da l'imposta da müdaman. L'occurrenza ha eir il scopo chi fluischan infuormaziuns tanter il cumüns, uschè chi's po profitar dad eventualas ideas dals oters. Uschè as voul eir evitar chi detta üna concorrenza tanter ils cumüns.

Radunanza generala - Acla da Fans

Il vicecapo orientescha cha'ls 24 d'avuost ha gnü lö la radunanza generala da l'Acla da Fans. Il resultat da l'on precedaint demuossa ün guadagn da frs. 24'000.00. Quai es il plü pitschen guadagn da la società ha raggiunt. Constatà es gnü, cha la vendita dad ölis minerals s'ha sbassada per 7%. Cun quai cha in Samignun es creschüda la quantità da la vendita per 7% suppuona il cussagl administrativ, cha quels duos svilups stettan in dependenza ün da tschel. La radunanza ha inavant approvà la proposta dal cussagl administrativ da pagar üna dividenda da frs. 1'500'000.00. Da quella resta ün import da frs. 1'000'000.00 sco liquidità illa società e frs. 500'000.00 vegnan pajats oura. Quista transacziun es pussibla be grazcha chi fluischan inavo mezs finansials da la Acla Immobiglias SA. A chaschun da la radunanza sun ils rapreschantants dal cumün gnüts dumandats, cur chi'd es previs da realisar las masüras quai chi riguarda la sgürezza per cas da fö. Il manader tecnic orientescha cha quai vegn coordinà cullas lavurs da sanaziun da la via chantunala.

Chasa da scoula Tschlin – Chasa Tschlin

Il vicecapo orientescha cha las masüras da fabrica pella fittanza sun finidas giò. Actualmaing as rechatta Martina Hänzi vi dal pulir l'edifizi. Previs es da fittar l'edifizi a partir dal principi d'october. Quai chi riguarda il local chi cuntegna ogets da la Società da Musica Tschlin as ha cunvgnü cha per quels vegn traparti il local d'ogets da la sala polivalenta cun üna paraid ed ün üsch. Ils cuosts in quist connex es previs cha'l cumün surpiglia. Quel local stess davo a disposiziun per roba chi's douvra suvent. Quai chi nu's douvra suvent resta illa chasa da scoula. Per tour oura da quella roba es da contactar a Martina Hänzi per cha quel possa drivir il local.

Cumischiun chasa da scoula Tschlin

Il vicecapo orientescha cha la cumischiun surnomnada ha visità l'organisaziun „Klangwelt Toggenburg“ per as far ün purtret sur da quell'organisaziun. Id ha fat impreschiun da verer che cha quels han miss in pè, mo eir che sustegn cha quels survegnan davart dal man public, dimena dal cumün e dal Chantun. Quista organisaziun es motor turistic pella regiun. I nu's das-cha però invlida cha la partenza es gnüda fatta avant raduond 20 ons. Pella cuntinuaziun dal proget s'ha pudü persvader a sar Kurt Baumgartner da Scuol da cusgliar a la cumischiun.

0120 Executiva

159 Varia (suprastanza cumünala)*Votumaziuns federalas dals 25 da settember*

Il manader da l'administraziun orientescha chi han lö als 25 da settember las proschas votumaziuns federalas. Per quel scopo es el in tschercha d'agüd davart da la suprastanza. Cun quai cha quel termin as rechatta amo illa fasa da la chatscha, as metta Ursina Caviezel a disposiziun per güdar.

7556 Ramosch, 04.10.2022



Il vicecapo:

Il manader administraziun: